

BA-VISION YA WILLIAM BRANHAM



Ba me sala bande yayi samu na Kimfumu ya Nzambi, samu ti mu ke pesa yawu na Mpangi Lee Vayle samu na kutula yawu na mukanda. Mpangi Vayle me lomba munu, awa na ntwala ya Mpangi Mercier, na—na kupesa mwa ba-vision ya ntama. Ya kieleka, ba-vision kisika . . . mu . . . ya nte . . . Mosi ya bima ya ntete mu lenda bambuka moyo, ya kele ba-vision, yina vwandaka kwisa. Ba-vision ke kwisaka ntangu nionso. Kasi na manima ya kundima ya munu kele kisika mu banza ti beno vwandaka sepela, Mpangi Vayle.

² Mbote, mu ke bambuka moyo, na manima ba biekaka munu na kati ya dibuundu, na dibuundu ya Baptiste, na Docteur Roy Davis, awa na Watt Street na Jeffersonville, kisika dibuundu vwandaka na ntangu yina. Mu ke bambuka moyo na vision mosi ya kulutula nene, ve na mwa basabala fioti na manima ya munu . . . na yina me tala . . . mu zolaka tuba, mwa bilumbu fioti na manima ya mbiekolo ya munu. Mu vwandaka . . . mu monaka vision ya kiboba ya bakala yina vwandaka ya kulala na lupitalu, yina ba diataka. Yandi vwandaka muntu ya ndombe. Mpe yandi belukaka na kintulumukina, na mutindu ti, ya salaka mubulu mingi. Mpe yandi basikaka na mbeto mpe kwendaka.

³ Mpe bilumbu zole, pene ya bilumbu zole, na manima ya yina, mu vwanda zenga bansinga, bansinga ya bantu yina vwandaka futa ve na New Albany, masa, mpe gaz, mpe—mpe lotiliki. Mpe yawu . . . Mu vwandaka me fuluka na kiesee! Ntangu nionso mu vwandaka mona yinzo mosi ya ntama, mu vwandaka kwenda kaka mpe kusambila, beno zaba, kisika muntu mosi ve vwandaka zinga.

⁴ Mpe mu ke bambuka moyo ti mu tubaka na Tata Johnny Potts, yina ke na kuzinga bubu yayi. Yandi kele pene-pene, mu banza, na bamvula makumi sambwadi to makumi nana. Yandi vwandaka muntu ya ntama yina ke talaka bitesilu ya masa. Mpe ba katulaka yandi na kisalu ya kutala bitesilu ya masa, mpe ba tulaka yandi na bureau, samu na kusonika mambu ya bantu mpe bima, kaka ntangu beno ke kota na kielo, mpe balubokilu ya kisalu. Mpe mu vwandaka tuba na yandi yina Mfumu me lakisa munu. Mpe yandi vwanda, na ntangu mosi to yankaka, kukatula bitesilu ya masa ya kingenga kisika yina muntu ya kusadila yawu vwandaka ve. Mpe na yayi, yandi—yandi vwandaka tuba, na muntu mosi . . .

⁵ Na yina, mu monaka na zulunale, kisika ba vwandaka na wagon ya ntama . . . Na bilumbu yina, ba vwandaka benda yawu na bampunda zole, mpe ba vwandaka lokota mvindu mpe bima yina ba vwanda losa, na nzila. Ya vwandaka na bakala mosi ya

ndombe na nkumbu ya Tata Edward J. Merrell. Yandi vwandaka zinga na 1020 Clark Street na New Albany. Mpe ba diataka yandi na bantu zole ya mindele, ya vwandaka mwana-kento mosi ya ntwenia ya mundele mpe—mpe mwana-bakala mosi, yina vwandaka tambula na ditoma. Mpe yandi zimbisaka ntwadusulu ya ditoma, mpe diataka yandi na piné ya wagon. Mpe ya bukaka kaka mikwa nionso na kati ya nzutu ya yandi, na kutala, mpe ntulu ya yandi, mingi-mingi. Yina nataka na lweka mukongo ya yandi. Mpe bawu nataka yandi na lupitalu, ya vwandaka mbote ve.

⁶ Mpe Tata Potts, na kuluta na lupitalu kuna na New Albany, tubaka na yandi ti Mfumu ke na kusalaka na munu. Mpe yandi fidisaka munu na kukwisa, kusambila samu na yandi. Mpe na mbala mosi, mu banzaka, “Ya kele bakala yina mu me monaka na vision yayi.”

⁷ Na yina, mu—mu vwandaka na boma na kukwenda, samu yina vwandaka mosi ya bambala ya munu ya ntete, beno me mona, na kukwenda mutindu yina. Na yina, kasi, na mutindu nyonso, mu kwendaka mpe bakaka nkundi ya munu, yina me katuka na kundima, mwana-bakala mosi ya ntwenia ya Lumputu na nkumbu ya George DeArk. Mpe mu twadisaka yandi kaka na Klisto. Mpe beto kwendaka. Mpe mu tubaka, “Ntangu yayi, Mpangi George, mu—mu—mu zola ti nge bambuka moyo. Bima yayi me salama na munu, mu lenda bakula yawu ve. Kasi, nge ke bambuka moyo, bakala yayi ke beluka. Mpe ntangu yandi ke beluka, ya ke. . . Mu lenda sambila ve samu na yandi tii kuna bantu zole ya mindele ke kwisa mpe ke telama na lweka yina ya mbeto, samu ti mu fwana sala yawu mutindu ba me lakisa yawu na munu.”

⁸ Mpe mu kwendaka na—na lupitalu mpe mu yufulaka kisika Tata Merrell vwandaka. Mpe mu kwendaka kuna, mpe kento ya yandi tubaka na munu ti yandi vwandaka na mpasi mingi. Mpe yandi lendaka ve kuningana samu ti kizame ya radiographie lakisaka ti mwa mikwa yayi vwandaka pene-pene ya poumon. Mpe kana yandi me ningana, na yina, ya zolaka, ya zolaka tobola ba-poumon ya yandi mpe kubasisa yandi menga na lufwa. Mpe yandi vwandaka na mpasi ya nene mingi. Mpe ya vwandaka na hemorrhagie ya fioti na laka ya yandi, mpe nionso yina, samu yandi vwandaka basisa menga na yinwa ya yandi. Yandi vwandaka ya kulala kuna pene ya bilumbu zole. Mpe bakala yango vwandaka, na ntangu yina, pene ya bamvula makumi sambanu na tanu, mu banza, makumi sambanu to makumi sambanu na tanu. Bakala ya kiboba; mandefo ya yandi, ya yinda, kumaka mpembe. Mpe bansuki ya yandi vwandaka mpembe.

⁹ Mpe mu kwendaka mpe tubaka na bakala yayi, ti, vision yina mu monaka na Mfumu. Mpe bantwenia kwisaka, yina diataka yandi. Mpe mu fukamaka samu na kusambila samu na yandi. Mpe na mbala mosi, bakala yayi bokaka, na kutubaka, “Mu

me beluka,” mpe me dumuka. Mpe kento ya yandi, vwanda meka na kuvutula yandi, na mbeto. Mpe mosi ya balifulume kwisaka, vwandaka meka na kuvutula yandi na mbeto. Mpe yandi dumukaka na mbeto, yandi vwandaka na nsayi mingi. Mpe na ntangu mu kwendaka na . . . mu tubaka na Mpangi George . . .

¹⁰ Mpe kuna mosi ya bamasoeur, ya vwandaka lupitalu ya Catholique, yandi kotaka mpe tubaka ti mu fwana basika kuna, ti ya vwandaka samu na munu ti bakala yayi vwandaka na nsayi. Samu, yandi vwandaka na fièvre, pene ya makumi yiya na yiya. Mpe kima ya ngitukulu, ntangu ba vutulaka yandi; nganga-Nzambi, kisika yina, mpe mwa badokotolo tulaka yandi, ba vutulaka yandi na mbeto, samu yandi vwandaka lwata bilele ya yandi. Mpe ntangu bawu bakaka tiya ya nzutu ya yandi, yandi vwandaka ve na tiya ya nzutu.

¹¹ Ntangu yayi, ya ke na bantu mingi ke na kuzinga bubu yayi, yina me monaka vision, yina me monaka yawu kusalama, to yina zaba yawu.

¹² Mpe mu kwendaka kuna mpe mu telemaka na zulu ya bimatinu, mpe mu tubaka na Mpangi George, “Ntangu yayi, nge tala mbote. Yandi ke lwata kazaka ya tinta ya café mpe yimpu ya tuyau ya kikalungu. Yandi ke kulumuka tii na bimatinu yayi, na mwa minuti.” Mpe kieleka yandi salaka yawu. Yandi me basika mpe me kulumuka.

¹³ Mpe na nkokila mosi na manima ya yina, Mfumu monanaka diaka na munu, na suka mosi, kaka pene-pene ya tongo kutana, mpe talisaka na munu kikata mosi ya kento, yina ke beluka. Na yina mu tubaka, “Mbote, mu ke—mu ke tala kaka kisika yandi kele.”

¹⁴ Mpe na yina mu kwendaka kuna mpe mu vwandaka balula mwa masa, na zulu, mu banza ti ya vwandaka, pene Bala-bala ya Nana na New Albany. Mpe mu vwandaka . . . Ya vwandaka yinzo ya bisika zole ya kulala, mpe mu vwandaka na boma ti mu zengaka masa na balweka nionso zole. Lweka mosi, bantu vwandaka me basika; mpe lweka yankaka, bantu vwandaka kuna. Na yina mu kwendaka na lweka yina vwandaka na bantu, yina vwandaka na bantu. Mpe mu konkotaka na kielo. Mpe bawu vwandaka bamputu ya kieleka. Mpe mwana-kento mosi ya kitoko ya ntwenia, kwisaka na kielo, yina me lwata bilele ya mputu mingi. Mpe yandi—yandi tubaka, “Yinki nge ke zola?”

Mu tubaka, “Nge zola zibula masa, samu na kutala kana yawu me kangama?”

¹⁵ Mpe yandi tubaka, “Yinga, tata.” Mpe yandi kwendaka. Yandi tubaka, “Ve. Masa ke na kubasika dyaka.”

Mu tubaka, “Matondo na nge.”

¹⁶ Mpe mama ya yandi, vwandaka ya kulala na mbeto, nkumbu ya yandi vwandaka Mama Mary Der Ohanian. Mpe yandi

vwandaka Armenien. Mwana ya yandi ya bakala vwandaka, mu ke banza, yandi vwandaka na kimvuka ya bansaka ya base, football na New Albany. Mpe yandi, mwana ya yandi ya kento, vwandaka na lukolo ya bambuta. Nkumbu ya yandi vwandaka Dorothée. Mpe yandi tubaka. . . Dorothée me tuba na munu, “Nge ke muntu ya Nzambi yina me sala kubeluka ya nzutu awa na lupitalu, kilumbu yina? Mama ya munu zola tuba na nge.” Mpe mu kotaka.

¹⁷ Mpe yandi tubaka na munu ti yandi vwandaka ya kulala, kikata. Mpe yandi vwandaka kikata, na mbeto, bamvula kumi na sambwadi, kubanda mwana-kento yayi kubutukaka. Mpe na yina mwana-kento yango vwandaka na bamvula kumi na sambwadi. Mpe na yina mu tubaka na yandi ti. . . Yandi tubaka, “Nge ke muntu yina ya Nzambi yina me belusa muntu yina?”

¹⁸ Mu tubaka, “Ve, mama. Mu ke belusaka ve. Mu ke sambila kaka—kaka samu na muntu ya kubela, mpe yina ba me lakisa na nzila ya Kima mosi yina me tuba na munu.” Mu zabaka ve mutindu ya kubokila yawu; vision, to yinki. Mu zabaka ve yina ya vwandaka, ntete. Mu vwandaka kaka mwana ya bakala, mpe yina me kwelana ve mpe nyonso. Mpe na yina ya vwandaka. . . Mama yayi—yayi lombaka munu na kusambila, samu na yandi. Mpe mu tubaka na yandi, “Bika mu sambila, ntete, mpe na manima kana Mfumu lakisa munu ti mu ke vutuka.”

¹⁹ Mpe kuna ntangu mu kwendaka kusambila. . . Mu nataka Mpangi George. Mpe mu tubaka, “Ya kele kento yina mu—mu vwandaka zonzila beno ti mu sambilaka. Mu zaba ti ya kele kento yina. Kwenda na munu.”

²⁰ Mpe beto kwendaka kuna samu na—samu na kusambila. Mpe na yina mwana-kento yayi ya leke ya bamvula kumi na sambwadi, ya kieleka, mu vwandaka kaka mwana-bakala ya ntwenia. Mpe yandi vwandaka na mpangi ya bakala, pene ya bamvula sambanu, nana, kima ya mutindu yina. Mpe ya vwandaka na sapin ya Nowele, ya vwandaka kaka na manima ya Nowele, yina vwandaka ya kutelama na yinzo. Mpe bawu kwendaka na manima ya sapin yayi ya Nowele, samu na kuseka munu. “Kubelula mama ya bawu.” Mu tubaka na yandi ti Mfumu ke belula yandi. Mpe mu. . . Mpangi George mpe munu kwendaka kusambila.

²¹ Mpe ntangu mu bandaka na kusambila, mbote, Wanzio yina mu ke monaka, Yina beno ke mona na foto, Mu monaka Yandi na zulu ya mbeto. Mbote, mu tandaka diboko mpe mu simbaka yandi na diboko. Mu tubaka, “Mama Ohanian.” Ntangu yayi, yandi ke na kuzinga na New Albany na ntangu yayi, yandi mpe bakala ya yandi, dibuta ya yandi. Mpe mu tubaka, “Mama Ohanian. Mfumu Yesu me fidisa munu, mpe me tuba na munu na ntwala ya kukwisa, ti, na kusambila samu na nge, mpe nge ‘ke beluka.’ Telama, mpe beluka, na Nkumbu ya Yesu.” Makulu ya

yandi vwandaka ya kubaluka na nsi ya yandi. Yandi, na Biblia ya yandi ya Armenien na zulu ya ntima ya yandi, yandi bandaka na kukwenda kuna na lweka ya mbeto. Mpe mutindu yandi salaka, yandi . . .

²² Na yina Satana tubaka na munu, yandi tubaka, “Kana nge bika ti yandi kudiata na ntoto, yandi ke pasuka nkingu ya yandi, na kukulumuka na zulu ya mbeto yina.” Mu vwandaka na boma na mwa ntangu fioti.

²³ Mpe mu vwandaka zaba ntangu nionso yina ba vision yina, mu zabaka ve yina yawu vwandaka na ntangu yina, mu tubaka na munu ti yawu vwandaka ntangu nionso ya kusungama. Na yawu mu kwendaka na ntwala, na mutindu nionso, bikaka yandi basika na mbeto. Mpe Nzambi kele mhangi ya munu, kaka na ntangu yandi bandaka, yandi dumukaka na mbeto yina, makulu zole me sungama. Mwana ya yandi ya kento bokaka, vwandaka kubenda bansuki ya yandi, mpe kimaka mbangu na bala-bala, ke boka ngolo mutindu yandi lendaka. Bankalani katukaka bisika nionso. Mpe yandi vwandaka kuna, kubanda ntangu ya ntete na bamvula kumi na sambwadi, yandi vwandaka tambula na kivinga yina, ke kembila Nzambi. Mu kwendaka, na mbala mosi, samu na kukwenda ntama na yawu.

²⁴ Na manima, mu zabanaka na mwana-kento yayi ya ntwenia, mpe mu kwendaka na yandi. Samu ti, yayi fwana vwanda ve na bande, kasi mu kwendaka na ntwenya ya kento yango.

²⁵ Ntama mingi ve na manima ya yina, mwa basabala fioti, mu vwandaka na yinzo ya mama ya munu, na nkokila mosi. Mpe mu vwandaka sambila, kilumbu yina, mpe mu—mu lendaka kaka ve kupasula nzila, tii na—na lunungu na kisambu ya munu. Mpe mu banzaka, mu ke bikana kaka . . . beno zaba, kukwenda kulala. Mu vwandaka bikana na yinzo, na ntangu yina. Mpe na yina mu kwendaka na kivinga, samu—samu na kusambila. Mpe mu . . . vwandaka pene ya ngunga mosi na suka, mu banza. Mpe mu—mu sambilaka.

²⁶ Mpe, na mbala mosi, mu talaka. Mpe, mama, yandi vwandaka baka bilele ya yandi, yandi vwandaka tula yawu kaka na kati ya kiti, beno zaba. Beto vwandaka bamputu ya kieleka. Mpe mu talaka, Kima mosi ya mpembe kwisaka na munu, mpe mu banzaka ti mu vwandaka tala kiti yina ya bilele. Kasi Yawu vwandaka Wanzio ya Mfumu, Dituti yina—yina, beno zaba. Mpe Yawu kumaka na kisika yina mu vwandaka.

²⁷ Mpe mu—mpe mu vwandaka ya kutelama na kivinga, mwa yinzo, yina beto ke bokilaka “yinzo ya minduki ya kuzomba,” mwa yinzo mosi ya fioti, bivinga zole na kati ya yawu. Mpe yawu vwandaka na mabaya ya mbwaki awa na lweka, beno me mona. Ya vwandaka na mwa mbeto ya makulu ya kisengo na diboko ya munu ya kibakala. Ya vwandaka na kento mosi ya bansuki ya ndombi yina vwandaka ya kuyekama . . . Kivinga

yina vwandaka kwenda tii na kinkuku. Yandi vwandaka ya kutelama na ntwala ya kielo ya kinkuku yina, yandi vwandaka ke dila. Tata mosi vwandaka ya kutelama na ntwala ya munu, mpe yandi nataka na munu bébé mosi, yina vwandaka na kima mosi na zulu ya mwa ntulu ya yandi. Mpe dikulu ya yandi, ya kikento, vwandaka ya kubaluka, ti kuna yawu vwandaka ya kubaluka na mwa nzutu ya yandi. Mpe dikulu ya kibakala, vwandaka ya kubaluka na lweka yina. Maboko nionso zole vwandaka ya kubaluka, diaka, na nzutu ya yandi. Mpe mwa nzutu ya yandi vwandaka ya kuniongumuka mpe ya kutengama tii na nkingu ya yandi *awa*. Mpe mu vwanda kukiyufula, “Yinki yayi zola kutuba?” Mpe mu talaka, kuna na diboko ya munu ya kikento, kento mosi ya kiboba vwandaka kuna, yandi vwandaka katula maneti ya yandi na meso, yandi vwandaka katula masa ya meso to kima mosi na maneti ya yandi. Na diboko ya munu ya kibakala, ya kuvwanda na zulu ya canapé mosi ya mbwaki, yina vwandaka ya kufwanana na kiti, vwandaka mwana-bakala mosi ya ntwenia, ya bansuki ya mpembe ya kunionga, yandi vwandaka tala na nela.

²⁸ Mpe mu talaka, ya kutelema ntama kuna na diboko ya munu ya kibakala, mpe telemaka . . . Wanzio ya Mfumu. Mpe Yandi tubaka na munu, “Bébé yayi lenda zinga?”

Mpe mu tubaka, “Tata, mu zaba ve.”

Yandi tubaka, “Tula maboko ya nge na zulu ya yandi. Yandi ke zinga.”

²⁹ Mpe mu—mu salaka yawu. Mpe bébé yango dumukaka, na . . . na maboko ya tata ya yandi. Mpe mwa dikulu ya yandi ya kibakala kusungamaka, mpe lweka ya yandi ya kibakala kusungamaka, diboko ya yandi ya kibakala kusungama. Mu tulaka dikulu yankaka, mpe lweka yina yankaka kusungamaka. Mu tulaka dikulu yankaka, mpe lweka yankaka kusungamaka, nzutu, kitini ya kati-kati kusungamaka. Mpe yandi tulaka mwa maboko ya yandi na maboko ya munu, mpe tubaka, “Mpangi Branham, mu me beluka ya muvimba.” Mwa bébé yayi vwandaka me lwata combinaison, to salopette ya velour, ya balweka ya bleu. Mpe yandi vwandaka na bansuki ya tinta ya café, mpe mwa yinwa, ya nkufi.

³⁰ Mpe na manima Wanzio ya Mfumu tubaka na munu ti Yandi vwandaka nata munu kisika yankaka. Mpe ba nataka munu ntama. Mpe Yandi tulaka munu na lweka ya maziamu ya ntama, mpe talisaka munu ntalu yina ba sonikaka na zulu ya ntoni, pene-pene ya yinzo-Nzambi mosi. Mpe Yandi tubaka, “Yayi ke vwanda kisika ya nge ya kutalaka.”

³¹ Yandi nataka munu na kisika yankaka. Mpe ya vwandaka na . . . ya monanaka ti yandi vwandaka na mbanza mosi ya fioti, na bamagazini zole na kati ya yawu. Mpe mosi vwandaka na ntwala ya jaune, na mabaya ya jaune na bibaka. Mpe mu

kwendaka kuna, to mu telemaka kuna. Mpe ya vwandaka na bakala mosi ya kiboba basikaka kuna, yandi lwataka kazaka mosi ya velour na balweka ya bleu, to jean ya bleu mpe combinaison ya bleu, na yimpu ya velour ya balweka ya jaune. Yandi vwandaka na mandefo ya nene, ya mpembe.

Yandi tubaka, “Yandi ke lakisa nge nzila.”

³² Mpe na manima ntangu mu vutulaka mabanza ya munu, mu monaka ti mu vwandaka tambula na kati ya kivinga mosi, mu vwandaka landa ntwenya mosi ya kento ya nene. Mpe mutindu mu kotaka na kielo, batinta vwandaka na zulu ya kibaka vwandaka ya mbwaki. Na zulu ya kielo vwandaka na bisono yayi, “Nzambi sakumuna yinzo ya beto.” Ya vwandaka na mbeto mosi ya nene, ya ntama, ya makulu ya kisengo yina vwandaka na diboko ya munu ya kibakala. Mpe dituka mosi ya dibaya vwandaka na diboko ya munu ya kikento. Mpe kuna na nsongi, mu tulaka mwana-kento mosi ya bamvula pene ya kumi na tanu. Mpe yandi vwandaka na kimbevo ya polio to kima mosi, ti dikulu ya yandi vwandaka ya kufiotuka. Mpe kitambi ya yandi vwandaka ya kubaluka, mpe ya vwandaka ya kubaluka na yandi mosi. Mpe yandi—mpe yandi vwandaka talana mutindu mwana ya bakala. Kaka, yandi vwandaka na bansuki mutindu mwana ya kento, mpe yandi vwandaka na bikoba yina me salama mutindu mwana ya kento.

Mpe Yandi tubaka na munu, “Mwana-kento yina lenda tambula?”

Mpe mu tubaka, “Tata, mu zaba ve.”

³³ Yandi tubaka, “Kwenda tula maboko ya nge na zulu ya estomac ya yandi.” Na yina mu banzaka ti yawu vwandaka mwana-bakala, ya kieleka kaka, samu Yandi tubaka ti mu tula maboko ya munu na zulu ya estomac ya yandi. Mu salaka mutindu Yandi tubaka na munu.

³⁴ Mpe mu waka muntu mosi kutuba, “Lukumu na Mfumu.” Mpe mu talaka na zulu. Mpe na ntangu mu salaka mutindu yina, mwana-kento yayi vwandaka telema. Mpe ntangu yandi telemaka, pyjama yina yandi lwataka, dikulu ya pyjama ya yandi zangukaka, mpe yawu lakisaka dibolongo ya londe mutindu dibolongo ya kento mpe ya kubenda, beno zaba, mutindu dibolongo ya bakala. Mpe mu zabaka ti ya vwandaka mwana-kento. Mpe yandi vwandaka me lwata ba-pyjama ya yandi. Mpe yandi kwisaka, na ntwala ya munu, na kusanunaka bansuki ya yandi. Yandi kele blonde, yandi vwandaka sanuna bansuki ya yandi.

³⁵ Mwana-kento ke zingaka na Salem, bubu yayi, yandi me kwelaka, mpe me kuzwa bana tatu to yiya. Mpe mama ya yandi mpe tata ya yandi kele kaka kuna, diaka.

³⁶ Mpe na yina mu—mu—mu vutulaka mabanza ya munu. Mpe mu lendaka kuwa muntu kutuba, “Mpangi Branham. . .” To,

“Mpangi Bill! Oh, Mpangi Bill!” Mpe mama ya munu vwandaka bokila munu. Mpe mu banzaka. Mu kuwaka ndinga mosi, na lweka mosi. Ntangu mu basikaka na vision yayi, beno zaba, mu vwandaka fioti ya kulemba. Mpe mu tubaka, “Yinki nge ke zola, mama?” Na kivinga yina landaka, kisika yandi vwandaka ya kulala.

Mpe yandi tubaka, “Ya kele na muntu ke na kukonkota na kielo.”

³⁷ Mpe mu kuwaka yawu, “Mpangi Bill!” Mpe mu zibulaka kielo. Ya vwandaka na bakala mosi kotaka kuna. Nkumbu ya yandi vwandaka John Emil. Yandi ke zingaka na Miami, na Floride, ntangu yayi. Mpe yandi tubaka, “Mpangi Bill, nge ke bambuka munu ve.”

Mu tubaka, “Ve. Mu ke kwikila ve ti mu ke bambuka moyo.”

³⁸ Yandi tubaka, “Nge botikaka munu mpe dibuta ya munu. Kasi,” yandi tubaka, “Mu bakaka nzila yina kele mbote ve.” Yandi tubaka, “Mu kufwaka muntu, awa mwa bilumbu me luta. Mu bulaka yandi nkomi ya munu, mpe bukaka nkingu ya yandi, na bitumba.” Yandi tubaka, “Mu me zimbisa mosi ya bana ya munu ya babakala, ya kulutula mbuta.” Mpe yandi tubaka, “Ya kulutula leke kele na yinzo, yandi ke na kufwa ntangu yayi.” Mpe yandi tubaka, “Dokotolo ya mbanza yina me bika yandi, mpe yandi tubaka, ‘Mwana ke na pneumonie zole.’ Mpe yandi vwandaka pema na mpasi.” Mpe yandi tubaka, “Mu—mu—mu—mu ke kaka . . . Nge kwisaka na ntima ya munu. Mpe mu ke lomba kana nge ke kwisa sambila samu na yandi.” Mpe yandi tubaka, “Ntangu yayi, mutindu nge zaba, mu kele kisoni ya Graham Snelling.” Na yina, Graham Snelling, Révérend Graham Snelling ntangu yayi, vwandaka ve mulongi na ntangu yina; ntwenya ya bakala ya Muklisto ya mbote. Yandi tubaka, “Yandi kele kisoni ya munu. Mu ke kwenda kuna samu na kubokila yandi.” Yina vwandaka zinga pene ya ba-metre nkama nana na munu, kuna na kati ya mbanza. Mpe yandi tubaka, “Mu ke kwenda sosa yandi. Mpe nge ke kwisa kuna?”

Mu tubaka, “Yinga, Tata Emil, na nswalu nionso mutindu mu ke lwata bilele ya munu.”

Mpe na yina yandi tubaka, “Mu ke baka ditoma ya munu, mpe mu ke nata nge kuna.”

Mu tubaka, “Mbote mingi.”

³⁹ Yandi tubaka, “Na nswalu nionso mu ke baka Graham. Mpe mu zola beno zole kusambila samu na bébé.”

Mu tubaka, “Mbote mingi.”

⁴⁰ Na yina mu kwendaka samu na kukubama. Mpe mama tubaka, “Yinki vwandaka diambu?”

Mu tubaka, “Ya kele na mwa bébé mosi ke beluka.”

Mpe na yawu yandi tubaka, “Beluka?”

Mpe mu tubaka, “Yinga, mama.”

Mpe na yina mu tubaka, “Mu ke tuba na beno yawu mingi ntangu mu ke vutuka.”

⁴¹ Na yina na mwa ntangu fioti, yandi konkotaka na kielo, mpe Mpangi Graham vwandaka na yandi. Beto lutaka awa, na yina beto zaba mutindu kisika ba ke salaka masuwa, yina vwandaka Kisika ya ntama ya masuwa ya Howard na ntangu yina. Mu tubaka, “Tata Emil, nge . . . Wapi nge ke zinga na ntangu yayi?”

Yandi tubaka, “Na Utica.”

⁴² Mu tubaka, “Nge ke zingaka na mwa yinzo mosi, yina beto ke bokilaka ‘yinzo ya minduki ya kuzomba,’ mwa yinzo ya bivinga ya zole.”

“Yinga, tata.”

“Yandi kele ya kuvwanda na mongo.”

“Yinga, tata,” yandi tubaka.

⁴³ Mu tubaka, “Plinthe ya nge—ya nge awa ba salaka yawu na mabaya ya rainure mpe languette, mpe ya kele na mukubu ya mbwaki.”

Yandi tubaka, “Ya kele mutindu yina.”

⁴⁴ Mu tubaka, “Mwa bébé yango me lala na mbeto ya makulu ya kisengo. Mpe yandi kele na yinzo, ya kulwata, salopette ya velour ya balweka ya bleu.”

Yandi tubaka, “Yandi kele na yawu.”

⁴⁵ Mpe mu tubaka, “Mpe bébé yango kele ntwenya, pene ya bamvula tatu. Mpe yandi kele diaka na mwa yinwa ya fioti, mwa bikoba ya fioti. Mpe yandi kele na bansuki ya ndundu ya kusema.”

Yandi tubaka, “Ya kele kieleka.”

⁴⁶ Mu tubaka, “Mama Emil kele kento ya ndombi. Mpe na kati ya kivinga yayi, nge kele na canapé ya mbwaki mpe kiti ya mbwaki.”

Yandi tubaka, “Nge me vwandaka ntete kuna, Mpangi Branham?”

Mu tubaka, “Kaka na mwa ntangu fioti me luta.”

“Na mwa ntangu fioti me luta?” yandi tubaka.

Mu tubaka, “Yinga.”

“Kasi,” yandi tubaka, “Mu me monaka nge ata fioti ve.”

⁴⁷ Mu tubaka, “Ve. Ya vwandaka na kimpeve.” Mu tubaka, “Tata Emil, nge me waka munu kutuba, kana mu botika nge, mambu yina ke salama na munu. Ti . . . Mu ke monaka bima na ntwala yawu salama.”

48 Yandi tubaka, “Yinga. Kima ya mutindu yina me salama na nge, Mpangi Branham?”

49 Mu tubaka, “Yinga. Mpe Tata Emil, Yina tubaka na munu yina ya vwandaka, Yandi me tubaka na munu luvunu ata fioti ve. Bébé ya nge ke beluka ntangu mu ke kuma kuna.”

50 Mpe yandi telemisaka ditoma, yandi bwaka na zulu ya piné, mpe tubaka, “Nzambi, wila munu mawa. Vutula munu, O Mfumu.” Beno me mona? “Mpe mu ke sila na Nge, na kuzinga samu na Nge, bilumbu ya munu nionso, kana Nge ke keba luzingu ya bébé ya munu.” Mpe kuna yandi pesaka ntima ya yandi na Klisto. Beto kotaka na yinzo, beto nionso vwandaka na nsayi, moyo mosi vutukaka na Klisto.

51 Ntangu beto—ntangu beto kwendaka na yinzo, bima nionso vwandaka kaka kieleka mutindu ya vwandaka, kaka mama yina ya kiboba vwandaka kuna ve. Na nsayi, na nsayi mingi, na yina mu tubaka, “Beno natila munu bébé yango.” Mpe bébé yango vwandaka zinga na mpasi. Beno me mona? “Kukangama” yina, vwandaka ti luzingu basikaka na bébé yango. Ya vwandaka ya kukangama *awa*, na mwa laka ya yandi. Mpe mu tubaka, “Beno natila munu bébé yina.” Mu vingilaka ve vision kusalama.

52 Mpangi Vayle, kana ba me tula mukanda yayi *awa*, mu lenda tuba mpova mosi ve tii kuna ba ke tula yawu kuna. Beno me mona? Ya fwana vwanda kaka mutindu Yandi lakisaka munu.

53 Na yina mu tubaka, “Natila munu bébé yango.” Mpe papa nataka bébé na munu, mpe mu sambilaka samu na yandi, mpe yandi kumaka yimbi mingi. Na yawu mu banzaka, “Ntangu yayi kima mosi . . .” Ya kieleka yandi zimbisaka pema ya yandi, mpe bawu zolaka nwana mpe kuningisa, mpe nionso yina, samu na kunata pema na kati ya yandi. Mu banzaka, “Ntangu yayi, kima mosi ke tambula mbote ve.”

54 Mpe mu banzaka, “Wapi kento ya kiboba?” Yina vwandaka ntete kuna ve.

55 Na yina ba ke baka bébé yango, ba vwandaka tulula yawu. Ba vwandaka tula bima nionso na nsi ya mbombo ya yandi, bima nionso, mpe vwandaka dila. Mama ya yandi vwandaka boka, mutindu muntu ya kidi-kidi, mpe nionso yina. Kasi bébé vwandaka pema kaka—kaka na mpasi.

56 Mu banzaka, “Mbote, na nzila ya buzoba ya munu—ya munu, Mu me sadila na mutindu ya yimbi vision ya Nzambi, samu mu me vingila Yawu ata fioti ve, na kuvwandaka na nsayi mingi.”

57 Na yayi, beno lenda mona, Mpangi Vayle, na yina mu ke vingila. Mu ke kipe ve nani ke tuba na munu. Mu zola beno mutindu mpangi ya munu ya bakala. Mpangi-bakala, kumeka ve, kutuba na munu kima ya kusala, ntangu mu—ntangu mu ke kuwa ti mu—mu ke na luzolo ya Mfumu. Beno me mona? Ata mutindu mbote ya ke talana mutindu yankaka, mu ke vingila

Yandi. Beno me mona? Mpe—mpe na yawu mu—mu me longuka leso kaka awa, bamvula mingi, mingi, mingi me luta; mpe kusala kieleka yina Yandi me tuba, mpe kusala yawu ve tii Yandi me tuba ti ya me kubama na kusalama.

⁵⁸ Bébé yango vwanda nwana na kupema. Ntangu yayi, mu vwanda lenda ve kutuba na bawu yina mu me sala, kasi mu zolaka vingila kaka. Mu banzaka, “Mu banza ti lemvo ke tala yawu ve, mpe Yandi ke lemvo kila munu.” Mbote, mu kwendaka, mu vwandaka.

⁵⁹ Bawu nwanaka samu na luzingu ya bébé tii na suka. Ntangu kilumbu bandaka na kutana, bawu banzaka ti bébé ke kwenda kaka na konso ntangu yina. Mbote, mu ke vwanda kuna. Mpe bawu landilaka na kuyufula munu, “Mpangi Branham, yinki beto fwana sala?” To, “Mpangi Bill,” ba bokilaka munu, “yinki mu fwana sala?”

⁶⁰ Mu tubaka, “Mu zaba ve.” Beno me mona? Mu vwandaka kuna, yintu ya munu na nsi, na kutubaka, “Mfumu, lemvo kila munu.”

⁶¹ Mbote, mpe na yina tongo tanaka. Mpangi Graham Snelling zolaka kwenda na kisalu. Na yina Tata Emil zolaka baka yandi, mpe mu zabaka ti mu zolaka bika yinzo.

⁶² Mpe, ntete, Mpangi Graham zolaka vwanda ya kuvwanda kuna, samu ti yandi kele na bansuki ya ndundu, ya kubaluka, mutindu beno zaba. Yandi zolaka vwanda ya kuvwanda na canapé yayi. Na yina mu vwandaka ya kuvwanda kuna kisika Mpangi Graham zolaka vwanda ya kuvwanda, kasi kiboba ya kento vwandaka kuna ve. Mpe kento ya kiboba kele ve na kisika yango. Na yina mu vwandaka kuna. Mpe na yina Tata Emil lwataka kazaka ya yandi.

⁶³ Na yina mu zabaka, kana Mpangi Graham me kwenda, ya ke vwanda mpasi na kutuba ntangu yandi ke vutuka. Beno me mona? Mpe na yina mu zabaka, mpe kana kento me kwisa, na yina Mpangi Graham ke vwanda kuna ve. Na yina beno ke mona mutindu mu vwandaka.

⁶⁴ Mpe na yawu Tata Emil tubaka, “Mpangi Branham, nge zola kwenda?” To, “Mpangi Bill, nge zola vutuka na yinzo? Nge zola ti mu vutuka na yinzo?”

⁶⁵ Mu tubaka, “Ve, tata. Mu ke vingila kaka, kana ya ke yangisa nge ve.” Mu vwandaka kuna na yinzo, bébé mpe mama ya yandi, munu mosi, samu bawu vwandaka bantwenia. Bawu, yandi, vwandaka na bamvula makumi zole na tanu, mu banza. Mpe mu vwandaka na mvula ya mutindu mosi. Mpe mu tubaka, “Ve. Mu ke vingila kaka—mu ke vingila kaka, kana ya ke yangisa beno ve.”

Yandi tubaka, “Ya kele mbote, mpangi-bakala, Mpangi Bill.”

66 Mpe na yawu mama yango vwandaka tambula, na kidi-kidi, mpe vwandaka meka na . . . vwandaka kudila mpe nionso yina, beno zaba. Mpe bébé yango kele kaka ya kulutila yimbi. Beno me mona? Ya vwandaka mutindu, na konso muniti, kupema ya yandi vwandaka kangama, mutindu *yayi*, yandi vwandaka sala, *hi, hi*, ya vwandaka kaka mutindu yina, pema, vwandaka na kati ya yandi. Mpe kima mosi ve. . . Ba vwandaka ve na penicilline mpe nionso, na bilumbu yina, beno me mona. Na yawu bawu vwandaka tula kaka—kaka ba-cataplasme na zulu ya bawu, mpe bima ya mutindu yina. Kasi mwa bébé kuzwaka vwandaka vwanda na yawu bilumbu mingi. Mpe yandi vwandaka me kwenda, beno me mona, to vwandaka kwenda.

67 Mpe, na yina, mu—mu vwandaka kuna. Mu banzaka, “Oh, la la, kana Graham me kwenda . . .” Graham vwandaka me lwata kazaka ya yandi, mpe yandi bandaka na kubasika na kielo.

68 Mpe yandi tubaka na kento ya yandi, yandi tubaka, “Ntangu yayi, beto ke vutuka, kaka na muniti mosi.”

69 Mu banzaka, “O Nzambi, na yina mu fwana bikala awa kilumbu ya muvimba, mpe mu banza mpimpa nionso, diaka, beno me mona, mu ke vingila vision yina. Yinki mu lenda sala?”

70 Mpe mu talaka na nela. Mpe kuna vwandaka kwisa pene-pene ya yinzo, nkooko ya bébé na kati kuna. Mpe, mbote, mu me zabaka na ntuala, ya vwandaka nkooko ya kento. Mpe yandi vwandaka me lwata maneti. Mu banzaka, “Yayi kele yawu, Mfumu, kana—kana Graham kubasika kaka ve na kielo.” Na yawu, yandi vwandaka kwisa ntangu nyonso na kielo ya ntuala. Kasi, na mutindu nionso, ba me zaba ata fioti ve, tii bubu yayi, kasi yandi kwendaka na kielo ya manima, samu na kukota na kinkuku. Mpe yandi kotaka na kinkuku, na mwa yinzo, ya ntama. Mpe na yina yandi kumaka na kielo, mwana ya yandi ya kento kwendaka mbangu kuna mpe yandi yambaka yandi, samu ti ya vwandaka mama ya mwana ya kento yina, beno zaba, mpe pesaka yandi bézé. Mpe Mpangi Graham . . .

Na yina yandi tubaka, “Bébé kele mbote mingi?”

71 Yandi tubaka, “Mama, yandi ke na kufwa.” Mpe yandi bandaka na kuboka mutindu yina, mpe mama ya yandi vwandaka dila.

72 Na yina mu banzaka, “Kana yayi ke sala kaka, ntangu yayi, kana Graham kubasika ve.”

73 Mpe mu telamaka. Mpe mu lendaka ve kutuba kima mosi, beno me mona, mu vwandaka kaka kulingila. Mpe Mpangi Graham tambulaka fioti. Mu telamaka samu ti yandi kuvwanda. Mpe yandi . . . Mpe yina vwandaka mosi ya dikanda ya yandi, beno me mona, na yina yandi bandaka na kudila, diaka, mpe vwandaka na canapé kisika yandi zolaka vwanda ya kuvwanda.

74 Mu banzaka, “Ntangu yayi, kana mama yina ya kiboba ke kwisa awa mpe ke vwanda na kiti yayi ya mbwaki!” Mpe mu vutukaka na kielo kisika Tata Emil vwandaka ya kutelama, na kazaka ya yandi, ya kukubama samu na kukwenda. Ya vwandaka ntangu ya madidi mingi, madidi ya kitembo ya ngolo. Mpe mu banzaka . . . Mpe mama yayi ya kiboba vwandaka na kiti yayi.

75 Mpe Graham vwandaka, mpe kulumusaka yintu ya yandi. Mpe mama ya bébé, yandi tulaka diboko na zulu ya kielo, mpe yandi bandaka na kudila. Kaka mutindu ya vwandaka na vision! Mpe mama yayi ya kiboba vwandaka. Mpe na kisika ya vwanda masa ya meso, kuna, na maneti ya yandi; mutindu madidi vwandaka, yawu kumaka lubungi. Mpe yandi tulaka diboko na mwa sanduku ya yandi mpe basisaka mwa muswale, mpe, to mwa sakosi, mpe yandi bandaka na kukatula bamaneti yayi. [Mpangi Branham me fina misapi ya yandi—Mu.] Mpangi-bakala, yawu yina.

76 Mu tubaka na Tata Emil. Mu tubaka, “Tata Emil, nge ke tula kaka kivuvu na munu mutindu kisadi ya Klisto?”

Yandi tubaka, “Ya kieleka, Mpangi Branham.”

77 Mu tubaka, “Mu lenda tuba na nge ntangu yayi. Ntangu mu me tuba na mwa ntangu fioti me tuba, mu kwendaka na ntwala ya vision, ya kele samu na yina ya me salama ve. Kana beno ke tula kaka kivuvu na munu, beno kwenda mpe beno natila munu bébé ya beno.” Oh, la la! Mu me mona ti ya vwandaka kieleka, na ntangu yina, beno me mona. “Beno kwenda, beno natila munu bébé ya beno.”

78 Yandi tubaka, “Mu ke sala nyonso yina nge ke tuba na munu na kusala, Mpangi Bill. Mu ke vwanda ve na boma ya kubaka yandi na maboko ya munu.” Samu, ntangu ba vwandaka baka yandi na maboko, yandi vwandaka kwenda kaka, yandi vwandaka zimbisa pema nionso. Yandi nataka mwana ya fioti na munu. Yandi tandaka diboko mpe yandi bakaka yandi na maboko ya yandi, yandi nataka yandi kuna na munu, mpe yandi telemaka kuna.

79 Mu tulaka diboko ya munu na zulu ya yandi, mu tubaka, “Mfumu, lemvokila kisadi ya Nge. Beno me mona? Mu zonzaka na ntwala ya vision ya Nge. Kasi ntangu yayi bika ti yawu kuzabana ti Nge kele Nzambi ya mazulu mpe ntoto.”

80 Ntama mingi ve, mu tubaka ti, mwa bébé yango simbaka papa ya yandi, yandi bandaka na kuboka mpe yandi vwandaka dila, na kutubaka, “Papa, mu me kuwa mbote ntangu yayi.” Beno me mona?

81 Mu tubaka, “Tata Emil, bika bébé swi. Ya ke vwanda bilumbu tatu na ntwala ya ke bika yandi, samu ti yandi salaka bitambi tatu, na kusalamaka.”

⁸² Mu vutukaka na yinzo, mpe mu tubaka yawu na dibuundu ya munu. Mu tubaka, “Mu ke vutuka.” Yina vwandaka na Kilumbu ya ntete. Mu tubaka, “Kilumbu ya tatu na nkokila, na ntwala ya yinzo-Nzambi, mu ke mata kuna.” Ba vwandaka bamputu, mpe beto sadilaka bawu kitunga ya bima ya kudia, beto natilaka bawu. Na yina mu tubaka, “Mu zola ti beno nionso kukwenda, mpe ntangu mu ke kwenda kuna. Mpe beno ke vwanda pene-pene ya yinzo. Mpe ntangu mu ke kuma na kisika yina, kisika yinzo yina kele, beno tala mbote mpe beno ke mona kana bébé yina ke tambula ve kuna na ntoto, na mwa mandefo ya fioti ba me sala *awa*, kisika yandi vwandaka kunwa miliki ya chocolat to kima mosi. Beno me mona? Mpe beno tula maboko ya yandi na kati ya munu, mpe beno tuba bampova yayi, ‘Mpangi Bill, mu me beluka ya muvimba.’ Mwa bébé yayi ya bamvula tatu. Beno tala mbote mpe beno ke mona kana ya ke salama ve.”

⁸³ Kento ya munu ntangu yayi, Meda, na ntwala beto kwelana, yandi vwandaka mpe na kimvuka yango. Mpe tomabilu vwandaka ya kufuluka na bantu mpe bawu vwandaka kuna pene-pene ya yinzo, beno me mona, samu na kumona munu ntangu mu ke kuma kuna na ditoma ya ntama ya Kompani ya Bisalu ya Leta yina mu nataka na yinzo na nkokila yina. Mu vwandaka ve na ditoma ya munu mosi. Ya vwandaka ya kufuluka na goudron na manima, mpe bima, beno zaba, yina mu nataka kilumbu yina, mpe samu na kuyidika bima. Mu kumaka na ntwala ya yinzo, mu telemaka. Mu kwendaka na velanda; mu konkotaka na kielo. Mpe bawu vwandaka ve na mwa tapi ya ntama na ntoto. Mpe mama yango kwizaka kuna, yandi tubaka, “Tala, ya kele Mpangi Bill,” mutindu yina. Mpe bantu vwandaka tala na banela, na ntangu yina, samu na kuzaba yina ke salama.

⁸⁴ Mpe na nsongi, mwa bébé yango, vwandaka sakana, kilumbu ya tatu. Mu telemaka, mu tubaka ata mpova mosi ve. Mpe yandi kwisaka, na lembami nionso yandi tambulaka na kivinga, yandi tulaka mwa maboko ya yandi na kati ya munu. Na . . . Yandi kunwaka miliki ya chocolat, na mwa mandefo ya yandi, bisika nionso *kuna*, samu na miliki ya chocolat. Yandi tulaka maboko ya yandi na kati ya munu, yandi tubaka, “Mpangi Bill, mu me beluka ya muvimba.” Huh!

⁸⁵ Na nkokila yina, na yinzo-Nzambi, mu tubaka yawu. Mu tubaka, “Kele na mwana-kento mosi ya kikata, kisika mosi kuna, yina kele na nsatu.” Mu tubaka, “Dibuundu, mu zaba ve yina bima yayi zola kutuba. Mu lenda tuba ve na beno.”

⁸⁶ Mpe—mpe mu vwandaka sala na Bisalu ya Leta. Mpe mu ke bambuka moyo kilumbu mosi, pene ya sabala mosi na manima ya yina, mu zolaka bika kivinga yango, mpe kubasika. Tata Herb Scott, yandi ke zingaka awa na kati ya mbanza na ntangu yayi, yandi vwandaka mfumu ya munu ya kusalu. Mpe yandi tubaka . . . Mu zolaka kulumuka. Yandi tubaka, “Billy?”

Mu tubaka, “Yinga.”

Yandi tubaka, “Na ntwala nge kwenda, mu kele na mukanda awa samu na nge.”

Mu tubaka, “Mbote, Herbie. Mu ke baka yawu na muniti fioti.”

⁸⁷ Mpe—mpe na yina mu kwendaka kuna samu na kusala kisalu ya munu yankaka, mu vwandaka fiongonina. Na yina mu kwendaka kuna samu na kusala kisalu ya munu yankaka. Mpe ntangu mu—mu kwendaka kuna, mu bambukaka moyo na mukanda yina. Mu kwendaka mpe mu bakaka yawu, mu zibulaka yawu. Mpe yandi tubaka, “Tata ya luzolo Branham,” beno me mona, yandi tubaka, “nkumbu ya munu kele Nail. Mu kele Mama Harold Nail. Beto ke zingaka na kisika yina ba ke bokilaka South Boston.” Mpe yandi tubaka, “Beto kele Methodiste, na lukwikilu. Mpe mu me tanga mwa buku yina nge sonikaka, yina ba ke bokila *Yesu Klisto Mutindu Mosi Mazono, Bubu yayi, Mpe Kukonda nsuka*, mwa buku ya fioti. Mpe beto vwandaka na lukutakanu ya bisambu na yinzo ya beto, na nkokila yina. Mpe beto me kuwa ti nge ke na kuzwa lunungu, na kusambilaka samu na bambevo.” Mpe yandi tubaka, “Mu ke na mwana—kento mosi ya ntwenia, ya bamvula kumi na tanu,” yandi tubaka, “yina me tandama na zulu ya mbeto ya kimbevo. Mpe na mutindu nyonso, mu zaba ve samu na yinki mu lendaka bika ve dibanza, ti mu fwana bokila nge samu na kukwiza sambila samu na mwana ya kento yayi. Nge zola kusala yawu? Ya beno ya kieleka, Mama Harold Nail. Na South Boston, na Indiana.”

Mu tubaka, “Beno zaba, ya kele mwana ya kento yango. Ya kele ya yandi.”

⁸⁸ Mu kwendaka na yinzo, mu tubaka na mama ya munu, mu tubilaka bawu yawu. Mu tubaka, “Yina kele—yina kele mwana—kento yango.” Mpe na yina na nkokila yina, na yinzo-Nzambi, mu tubaka na dibuundu. Mu tubaka, “Tala yina—yina—yina—yina kele kisika yango.” Mu tubaka, “Muntu nionso kuzaba kisika South Boston kele?”

⁸⁹ Mpe Mpangi George Wright, beno nyonso zaba yandi, yandi tubaka, “Mpangi Branham, ya ke. . . Mu banza ti ya kele kuna na Sud.”

⁹⁰ Na yina kilumbu yina landaka, bankundi zole ya munu, mpe kento ya munu, yina ya ntangu yayi, mpe bakala mosi mpe kento ya yandi na Texas. Na-. . . nkumbu ya bawu vwandaka Brace, Ad Brace. Yandi ke zingaka na nsi awa ntangu yayi, na nsi ya Milltown, yandi kele fermier. Yandi kele fermier kuna na Weste. Mpe yandi kwisaka awa samu na kuvwanda pene-pene ya yinzo-Nzambi. Mpe mu sambilaka samu na kento ya yandi, mpe yandi belukaka na kimbevo ya tuberculose. Mpe na yina yandi zolaka kumona yayi kusalama. Mu tubaka, “Nge ke kwenda na munu, mpe nge ke mona kana ya ke salama ve kaka mutindu

yayi.” Na yina mama monaka ata fioti ve vision, Mama—Mama Bruce. Na yina kento ya munu kwendaka na munu. Mpe Mpangi Jim Wiseheart, kuluntu ya kiboba, beno ke bambuka moyo, dibuundu kuna, diakre ya ntama, yandi zolaka kumona yawu. Mu vwandaka kaka na ntangu yina, na mwa roadster ya ntama, mpe mu fulusaka bawu kuna na kati.

⁹¹ Mpe beto kwendaka kuna na New Albany. Mpe mu monaka kidimbu yayi, mpe mu bakulaka, ya vwandaka ve South Boston. Ya vwandaka New Boston. Na yina mu zabaka ve kisika ya kukwenda, na yina mu vutukaka kuna na Jeffersonville mpe mu yufulaka muntu mosi. Mpe muntu mosi kwendaka na bureau ya poste, ba tubaka, “South Boston kele kuna na zulu ya Henryville.”

⁹² Na yina mu—mu kwendaka kuna na Henryville, mpe mu yufulaka kuna. Mpe bawu tubaka, “Baluka na nzila yayi. Ya vwandaka pene ya ba-kilomètre makumi zole na yiya, kuluta mwa bamongo yayi *awa*, nge ke mona mwa kisika mosi. Nge ke sala keba, kana ve nge ke kondwa yawu,” yandi tubaka, “samu ti ya kele kaka mwa magazini. Mpe magazini kele na bureau ya poste, bima yankaka, na kati ya yawu. South Boston, kuna kele mwa bamongo yayi.” Ya kele na ba-hectares sambwadi ya bawu yina kuna, beno me mona. Mpe yayi kele kuna na manima ya yawu, na myongo kuna.

⁹³ Na yina beto landilaka, na kunata ditoma. Mpe na mbala mosi, mu kuzwaka nsatu mosi ya ngitukulu, na manima ya kutambula na ditoma, ba-kilometre nana to kumi, mu kuzwaka nsatu mosi ya ngitukulu. Mu tubaka, “Mu zaba ve.”

Bawu tubaka, “Yinki kele diambu?”

⁹⁴ Mu tubaka, “Mu banza ti—ti Muntu yina ke tubaka na munu, zola kutuba na munu, na yina mu fwana bika ditoma.”

⁹⁵ Na yina mu basikaka na ditoma. Mpe bakento yayi vwandaka ya kuvwanda na zulu ya mabolongo ya bakento, beno zaba, mpe nionso yina, na mwa roadster yina ya ntama. Mpe mu basikaka na ditoma, mpe mu kwendaka na manima ya ditoma. Mpe mu kulumusaka yintu ya munu, mu tulaka dikulu na zulu ya pare-chocs na manima ya ditoma. Mpe mu tubaka, “Tata ya Mazulu, yinki Nge ke zola kisadi ya Nge kuzaba?” Mpe mu sambilaka. Kima mosi ve salamaka. Mu vingilaka mwa minuti. Mpe mu banzaka, “Mbote, Yandi. . .” Bambala mingi kisika bantu kele mingi mutindu yina, mu fwana vwanda munu mosi. Mpe na yina mu vingilaka mwa ntangu fioti.

⁹⁶ Ya monanaka ti mu vwandaka me bendama, samu na kutala kuna. Mu me tala, “Mbote, tala awa, yayi kele dibuundu ya ntama yina kele awa.” Mpe kana beno me monaka ntete ve. . . Ya kele Dibundu ya Bunker Hill. Mpe mu talaka kuna na lweka, Dibundu ya Baklisto Ya Bunker Hill, mpe ya vwandaka na bantoni ya maziama, kaka na ntuala ya yinzo-Nzambi.

⁹⁷ Mpe mu kwendaka kuna. Mu tubaka, “Ntangu yayi beno nyonso me sonika mikanda yayi.” Mu me vwandaka ata fioti ve na yinsi yina na ntwala, na luzingu ya munu. Mu me vwandaka ata fioti ve kuna na zulu, bisika nionso, na luzingu ya munu. Mpe mu tubaka, “Beno kwisa awa na bankumbu yayi mpe banumelo yayi mpe beno kwisa awa, beno tala kana ya kele ve mutindu mosi na yina kele na zulu ya ntoni.” Mpe yawu vwandaka kieleka, mutindu yina. Mu tubaka, “Yawu yina. Beto ke na nzila ya mbote ntangu yayi.” Mu tubaka, “Yina vwandaka Wanzio ya Mfumu.” Beno me mona, mu lutaka kaka na lweka ya yawu, mpe mu zabaka yawu ve. Na yawu, oh, Yandi kele ya kulunga.

⁹⁸ Mpe na yina beto landilaka na kukwenda mpe kukwenda na ditoma. Na mbala mosi mu kutanaka na bakala mosi, mpe mu tubaka, “Nge lenda tuba na munu kisika South Boston kele, tata?”

⁹⁹ Yandi tubaka, “Beno baluka na diboko ya kibakala mpe diboko ya kikento,” beno zaba, mpe nionso yina. Mpe beto landilaka kaka na kukwenda.

¹⁰⁰ Na yina na manima ya mwa ntangu, beto kumaka, mu talaka, mu kotaka na mwa kisika mosi. Mpe ya vwandaka mutindu, mwa bwala mosi. Mpe mu—mu talaka. Mu tubaka, “Yawu yina. Yawu yina, kaka kuna.” Mu tubaka, “Ya kele. . . Kuna, ya kele magazini na ntwala ya jaune.” Mpe mu tubaka, “Ntangu yayi, beno tala mbote. Bakala mosi ke basika kuna, yandi me lwata combinaison ya bleu, na yimpu ya velour ya balweka ya mpembe. . . to velour ya balweka ya jaune, na mandefo ya mpembe, mpe yandi ke lakisa na munu kisika ya kukwenda. Kana ya kele ve mutindu yina, mu kele muntu ya nene ya luvunu.”

¹⁰¹ Mpe na yawu bawu nionso vwandaka vingila. Mpe—mpe mu kumaka na ditoma, na ntwala ya kisika yango. Mpe kaka ntangu mu kumaka kuna na ditoma, na ntwala, bakala yango basikaka na combinaison ya bleu, mpe yimpu ya velour ya balweka ya bleu, na mandefo ya mpembe. Mpe Mama Brace kubwaka ngambu na kati ya ditoma, na kumonaka yawu me salama, mutindu yina.

Mu tubaka, “Tata, nge fwana tuba na munu kisika Harold Nail kele.”

Yandi tubaka, “Yinga, tata.” Yandi tubaka, “Nge me katuka na Sud?”

Mu tubaka, “Yinga, tata.”

¹⁰² Yandi tubaka, “Beno me luta yawu. Pene ya ba-metre nkama nana kuna na nsi ya nzila, beno baluka, nzila ya ntete na diboko ya kikento. Beno ke mata kuna, mpe beno ke mona kidikilu mosi ya nene ya mbwaki, mpe beno ke baluka kuna na kidikilu.” Yandi tubaka, “Ya ke yinzo ya zole na diboko ya nge ya kibakala,

mutindu beno ke baluka na nzila yina kele mutindu mwa nzila ya fioti.”

Mu tubaka, “Yinga, tata.”

Yandi tubaka, “Samu na yinki?”

Mu tubaka, “Yandi ke na mwana-kento mosi kele na kimbevo. Mutindu yina ve?”

Yandi tubaka, “Yinga, tata. Ya kele mutindu yina.”

¹⁰³ Mu tubaka, “Mfumu ke belula yandi.” Mpe kiboba yayi ya bakala bandaka na kudila. Beno me mona? Yandi zabaka ata fioti ve. Mpe na yina yandi vwandaka na kati ya vision yango. Yandi zabaka ve yina vwandaka salama.

¹⁰⁴ Mu balukaka. Beto ningisaka diaka Mama Nail. Mpe beto kwendaka kuna, mu kotaka na makulu na lupangu. Beto basikaka na ditoma, beto kwendaka kuna. Beto kwendaka kisika yina. . . beno zaba, na kisika yina ya vwandaka. Mpe ntwenya mosi ya kento ya nene kwizaka na kielo. Mu tubaka, “Yandi yayi.” Beno me mona?

Mpe na yina yandi tubaka, “Mbote”

Mpe mu tubaka, “Mbote?” Mu tubaka, “Mu—mu kele Mpangi Bill.”

¹⁰⁵ “Oh,” yandi tubaka, “Mu—mu—mu banzaka ti ya vwandaka nge.” Yandi tubaka, “Nge kuzwaka mukanda ya munu?”

Mu tubaka, “Yinga, mama, mu kuzwaka yawu.”

Yandi tubaka, “Mu kele Mama Harold Nail.”

¹⁰⁶ Mu tubaka, “Mbote, mu ke na kiese na kuzaba nge, Mama Nail. Mpe yayi kele mwa kimvuka ya fioti me kwiza na munu, samu na kusambila samu na mwana ya nge ya kento.”

Yandi tubaka, “Yinga.”

Mu tubaka, “Yandi ke zola kubeluka.”

¹⁰⁷ Yandi tubaka, “Yinki?” Mpe bikoba ya yandi bandaka na kutekita. Yandi bandaka na kudila.

¹⁰⁸ Mu tubaka, “Yinga, mama.” Mpe mu—mu zaba ve; mu bikanaka ata fioti ve kuna na kento yayi.

¹⁰⁹ Mu kwendaka mbala mosi na couloir, mpe mwa kimvuka ya munu vwandaka landa munu. Ntangu mu zibulaka kielo na couloir ya yinzo yayi ya nene, ya ntama, ya yinsi, ntangu mu zibulaka kielo, ya vwandaka na ba-papier ya jaune. . .to bazulunale ya jaune na zulu ya kibaka, na batinta ya mbwaki; na bisono yayi, “Nzambi sakumuna yinzo ya beto;” na mbeto ya makulu ya kisengo; dituka ya mabaya na diboko ya munu ya kikento. Mpe ya vwandaka na mwa mbeto ya camp kuna, kisika mwana yayi ya kento yina vwandaka mutindu mwana-bakala vwandaka me lala na kati ya yawu.

¹¹⁰ Ntangu yayi kima mosi salamaka. Mu vwandaka kuna na nsongi ya kivinga, mu vwanda tala nzutu ya munu ke kwenda na mbeto yina. Mpe mu tulaka maboko ya munu na zulu ya estomac ya yandi, ya kieleka mutindu Mfumu tubaka. Mpe ntangu mu salaka yawu, ntangu Mama Nail kotaka na kivinga mpe monaka yawu, yandi kubwaka na ntoto, diaka, yandi kubwaka ngambu. Yandi kele mutindu muntu ya kulemba mingi, mpe yandi kubwaka na ntoto, diaka. Mpe Mpangi Nail vwandaka meka na kuningisa yandi. Mpe kiboba ya Mpangi Jim yina kele ya kutelama kuna, na kutubaka, “Nkembo na Mfumu,” vwanda simba maboko ya yandi kintwadi, kana beno nyonso zabaka mutindu yandi salaka. Mpe na yina mu talaka yawu, mpe mu monaka yawu.

¹¹¹ Mpe mu tulaka maboko ya munu na zulu ya yandi, to na zulu ya estomac, mutindu *yayi*. Mu tubaka, “Mfumu, mu ke sala yayi mutindu lutumu, yina mu ke banza, Nzambi tubaka na munu na kusala yawu.” Mpe kaka na ntangu yina, yandi bandaka na kudila, mpe yandi dumukaka na zulu.

¹¹² Mpe ba telemisaka Mama Nail. Yandi vumbukaka, na ngambu ya yandi.

¹¹³ Mpe ntangu mwana-kento yango me dumuka na mbeto, tala dikulu ya pyjama ya yandi me zanguka na dikulu ya kibakala, kaka kieleka mutindu ya vwandaka na vision. Mpe ya vwandaka na dibolongo ya ronde ya mwana-kento, na kisika ya mwana-bakala.

¹¹⁴ Mpe kuna kulumukaka kuna Mama Nail, diaka. Beno me mona? Yandi kubwaka ngambu. Yina vwandaka mbala tatu yandi kubwaka ngambu.


¹¹⁵ Mpe mwana ya kento yina me basika kuna, na kivinga yina. Mpe yandi kwendaka na kati ya kivinga ya yandi, na kudilaka, mpe yandi lwataka kimono ya yandi, yandi vutukaka, na sanuna bansuki ya yandi. Na . . . na diboko yina ya ki- . . . Mpe diboko ya yandi—ya yandi ya kifu, diaka, na lweka ya kibakala. Yandi vwanda sanuna bansuki ya yandi na diboko yina ya kifu.

¹¹⁶ Yandi me kwelana, yandi kele na nkonga ya bana. Nkumbu ya yandi, mu zaba ve yinki kele nkumbu ya yandi ntangu yayi. Kasi Nail, muntu nionso lendaka tuba na beno, Harold Nail.

¹¹⁷ Mpe ba-vision yina kele kieleka. [Kisika ya mpamba na bande—Mu.] Mu lendaka kutanga mambu yayi mpe kunata beno na bantu yayi ti ba lendaka sala babuku na bima yayi me salama. Ntangu yayi, yina kele kieleka, Mpangi Vayle.

¹¹⁸ Mu ke kubwa; mu kele muntu. Mu kele ya kubwa, na kubanda, mpe mu kele kaka kiyingilu ya mputu ya nene ya kisadi ya Klisto. [Kisika ya mpamba na bande—Mu.]

¹¹⁹ [Mpangi Vayle me tuba, “Spell Merrell?”—Mu.] M-e-r-r-e, ba-l zole. [“Mu banzaka ti ya vwandaka yawu kuna. Yinga.”]

Ya kele kaka nionso yayi, na nionso yina? [“Nail vwandaka N-e-i-l?”] N-a-i-l. [“Brace, B-r-a-c-e?”] B-r-a-c-e, Ad, Ad Brace. [“Ntangu yayi mu banza ti mu me baka yawu nionso. Mwa ntangu fioti. Graham Shelling?”] Graham, G-r-a-h-a-m. [“Ya kele ‘n’ kuna.”] S-n-e, ba-l zole, i-n-g. [“Oh, Snelling. Ntangu yayi beto me kuzwa yawu.”] 

BA-VISION YA WILLIAM BRANHAM KNG60-0930
(Visions Of William Branham)

Nsangu yayi ya Mpangi William Marrion Branham, kulongamaka na Kingelesi, na Kilumbu ya tanu na suka, na kilumbu ya 30 ya Ngonda ya yivwa, na mvula 1960, na Campaign Office na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisdilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org